

## Minister di Turismo y Cultura Otmar Oduber ta orguyoso di por firma un MoU cu dos instancianan importante

**ORANJESTAD** - Den cuadro di e 60 celebracion di Carnaval, Minister di Turismo, Transporte, Sector Primario y Cultura Otmar Oduber a reuni diahuebs mainta na Oficina di Turismo (ATA) pa firma un MoU entre Ministerio di Turismo, Transporte, Sector Primario y Cultura, ATA, SAC y Organizacion Musica. E acuerdo di entendimiento aki lo contribui pa engrandecede ainda mas e fiesta cultural importante aki tanto local como internacional.

Minister Oduber ta splica cu Departamento di Cultura (DCA), ATA y Ministerio di Turismo, Transporte, Sector Primario y Cultura a combersa algun siman pasa riba e importancia di Carnaval pa loke ta trata cultura di Aruba y pa dun'e su debido reconocimiento. Di otro banda mester ta agradecido pa loke Carnaval ta significa pa e pilar economico principal di Pais Aruba cu ta turismo. Carnaval ta un di e instrumentonan cu ta wordo uza henter aña pa promociona nos isla banda di e otro aspectonan cultural. Practicamente den tur revista, comercial na television, conferencia, seminario, 'trade



show' y reunionnan cu tin riba nivel internacional, presenta pa ATA y unda Aruba ta representa su mes, Carnaval ta forma sigur un parti importante di e promocionan aki, e mandatario ta bisa. Minister Otmar Oduber ta indica con conhuntamente cu DCA a tuma e decision pa documenta e di 60 aniversario di Aruba su Carnaval. E meta principal ta pa uza e

material aki pa asina prepara materialnan educativo cu por wordo reparti na tur scol rond di Aruba, haciendo di e aspectonan cultural conhuntamente cu e aspecto di turismo un actor importante den e sistema y curriculum di educacion. Despues di algun encuentro cu Ministerio di Turismo, Transporte, Sector Primario y Cultura, ATA, DCA, Organi-

sacion Musica y SAC a yega na acuerdonan pa por firma un Memorandum of Understanding (MoU) entre ATA y DCA cu ta dos instancia importante cu ta dirigi y orkesta Carnaval aki na Aruba, esta SAC y Organizacion Musica. Cu e MoU aki e Ministerio di Turismo, Transporte, Sector Primario y Cultura, ATA y DCA ta pone un suma di 190 mil Florin disponibel

pa loke ta trata e periodo di Carnaval aki. Entre e diferente motibonan a aloca 100 mil florin na disposicion di SAC ta pa dedica esaki na e gruponan di Carnaval segun un serie di criterionan cu tin stipula. Esaki cu e meta su tras pa duna e gruponan di Carnaval e participacion y brinda nan e sosten cu tanto nan a pidi pe pa hopi aña. Esaki sigur lo yuda pa hunto engrandecede nos Carnaval, e mandatario ta splica.

Minister Oduber ta indica cu banda di esaki lo pone un suma di 35 mil florin disponibel pa Organizacion Musica pa asina aki sostene e festival di CAISO e aña aki, pa asina yuda pone riba pia cu e intencion pa otro aña internacionalisa e festival aki. Lo bay brinda e sosten pa promociona e festival aki riba nivel internacional y regional pa asina aki atrae bishitantenan pa asisti na un festival di caliber haltu, haciendo di e festival di CAISO un atraccion turistico mas.

Pa Minister Oduber ta un privilegio y honor pa comparti e momento historico y importante aki cu tur e instancia cu ta yuda engrandecede Carnaval di Aruba. □